

修訂日期: 2009/04/23 發行日期: 2009/5/9

發行單位: 中華電子佛典協會 (CBETA) <http://www.cbeta.org>

資料底本: 大正新脩大正藏經 Vol. 21, No. 1351

原始資料: 蕭鎮國大德提供, 北美某大德提供

## No. 1351 [Nos. 1352-1355]

### 佛說持句神呪經

吳月支優婆塞支謙譯

聞如是。一時佛在舍衛國祇樹給孤獨園。與大比丘眾千二百五十人菩薩萬人。爾時從是佛土過億百千佛國。有世界名無量華。其佛號鄧尊王如來無所著至真等正覺。今現在說法。彼佛遣二菩薩。一名無量光明二名大光明。時二菩薩來至釋迦文佛所。稽首佛足却住一面。前白佛言。唯然世尊從是佛土過億百千佛國。有世界名無量華。其佛號鄧尊王如來。遣我等來。世尊如常不其眾安隱無他耶。天龍鬼神餓鬼女鬼鳩桓。若人非人虎狼毒獸。得無燒亂人民。用是故佛遣是持句呪來。哀念眾生令安。吉善名聞威神得力。如是。

闍梨摩訶 闍梨羅尼 優佉目佉 沙波提 摩訶沙波提

佛告阿難。受是持句呪執持誦說。佛世難值。持句呪亦為難遇。善男子善女人。受是持句呪。諷誦讀識七世宿命。受持者一切浮陀鬼神若人非人。不得燒近。毒蛇不敢螫。毒藥自然除。刀亦不能傷。王亦不能害。梵亦不瞋之。是持句呪。七十七億佛所說。犯是呪者當獲重罪。復有菩薩彌勒等八十人。告賢者阿難。我亦當說持句呪。哀念眾生令安。吉善名聞威神得力。如是。

阿知和知 吒佉羅羅 里彌喜利 彌利提盧 留彌勒

佛告阿難。受是持句呪執持誦說。佛世難值。持句呪諷誦讀識。十四世宿命。受持者一切浮陀鬼神。若人非人不得燒近。毒蛇不敢螫。毒藥自然除。刀亦不能傷。王亦不敢害。梵亦不瞋之。是持句呪八十四億佛所說。謗是呪者當獲重罪。

佛告阿難。我亦當說持句呪。哀念眾生令安。吉善名聞威神得力。如是。

阿知和知 那知鳩那知 提梨 沙羅波提 阿那波提 波那提 波那迦和尼 摩訶迦和尼

佛告阿難。受是持句呪執持誦說。佛世難值。持句呪亦為難遇。善男子善女人。受是持句呪諷誦讀。識無數世宿命。受持者一切浮陀鬼神。若人非人不敢燒近。毒蛇不敢螫。毒藥自然除。刀亦不敢傷。王亦不敢害。梵亦不瞋之。是持句呪無數億佛所說。犯是呪者當獲重罪。佛告阿難。是持句呪。行道中當念之。若至縣官若行賊中。若蠱道若毒若刀刃中。若人非人中當念之。是持句呪於枯樹令生葉華實。何況為人結縷也。當使吉百病消除。自然安隱辟除凶害。南無佛令呪皆得從願。佛說經已皆大歡喜。

